

Uz i Cargill

Na komienso di aña, e suseso dramátiko ku a tuma lugá na Cargill Salt Company a sagudí nos isla. Durante e simannan ku a sigui, hopi hende a trese nan punto di bista dilanti na un forma públiko. Algun ta haña ku e èks-empleado di Cargill, Uz Evertsz, no ta meresé pa sinta tras di trali pa motibu di e inhustisia ku e mester a soportá. Otronan ke kolektá sèn pa yuda e akusado den su bataya kontra inhustisia. Tin hende ta rasoná ku inspektor Ivan Wild a buska problema pa su mes i pues no por akusá señor Evertsz di intento pa asesin'è.

Nos por komprendé sintimentu di famia, amigu, kolega, èts. E suseso aki ta penoso, un sla hopi duru pa nan soportá den nos komunidad chikitu. Ma apesar di e emoshonnan doloroso, ta bon pa nos para pensa un ratu ku kabes friu kiko Palabra di Dios ta bisa den kasonan asina.

Algun ta konvensé ku kulpabilidad pa e kaso lamentabel aki ta sinta na porta di e kompania di salu. Si Cargill Salt Company a trata su empleado manera debe ser, nunca señor Evertsz lo a tuma akshon tan drastiko. Beibel ta instruí shonnan (doño di trabou den tempu ku Beibel a wòrdu skirbí) kon pa trata nan katibunan (empleadonan den antigwedat). “Shonnan, duna boso esklabunan loke ta hustu i korekto, sabiendo ku boso tambe tin un Shon den shelu” (Kolosensenan 4:1). “I boso, shonnan,...laga amenasa para...” (Efesionan 6:9). Si Cargill no a trata señor Evertsz na un forma hustu i korekto, sin menasa, nan a violá Dios su instrukshon pa ku doñonan di trabou i **ta responsabel pa esaki**.

Ma di otro banda, Skritura tambe ta duna instrukshon ku ta apliká na e akusado den kasonan asina. Eksodo 22:5-6 ta duna dos ehèmpel mustrandu ku un persona ta responsabel pa su akshonnan destruktivo. “Si un hende laga su bestianan kome yerba den un kunuku òf den un plantashon di wendruif, i laga nan lòs, asina ku nan ta kome yerba den kunuku di otro hende, e mester hasi restitushon di e mihó di su mes kunuku i di e mihó di su mes plantashon di wendruif. Si un kandela sende i plama bai den mata di sumpiña, asina ku maishi mará, maishi pará den kunuku òf e kunuku mes kima kaba na nada, esun ku a sende e kandela mester hasi restitushon sigur.” Den ningun di dos kaso tabata destrukshon **intenshonal**. Asta ora e destrukshon ta **aksidental**, tòg e **persona ku a kousa e destrukshon (maske ta indirèkt) ta keda responsabel**. Maske e kompania por tin falta den e manera ku el a trata su empleado, esei no ta kita responsabilidad di empleado pa su akshonnan.

Nos ta preokupá pa loke algun ta komuniká relashoná ku e suseso trágiko aki. Dor di despensá, ekskusá, hustifiká, i asta defendé señor Evertsz su akshonnan, nan ta komuniká algun filosofia peligroso. 1) Nan ta promové e mentalidat ku hende no ta responsabel pa nan akshonnan. Pues, si mi ta hòrta, mi no ta responsabel pa mi akshonnan pasobra mi ta un víktima di mi sirkunstansianan: pobresa òf nesesisdat. Of si mi dal un hende mata, mi no ta responsabel pa mi akshonnan pasobra mi sirkunstansianan insoportabel por a okashoná rabia den mi. Segun e filosofia popular aki, tur hende ta víktima di nan sirkunstansianan i pues no ta responsabel pa nan akshonnan. E mentalidat ei tin implikashonnan sumamente peligroso pa nos komunidad.

2) Dor di defendé akshonnan di señor Evertsz, nan por ta bezig enkurashando otronan pa ekspresá nan frustrashon na forman inaseptabel. Si e argumento ku señor Evertsz no ta responsabel pa su akshonnan ta korekto, anto un empleado di Radio Nederland Wereldomroep tampoko ta responsabel si e ta destruí vários antena pasobra e no a haña e trato ku e ta meresé. Tambe lo ta derechu di un èks-trahadó di Bopec pa bula un tanki yen di zeta òf un empleado malkontentu di Air ALM pa tumba un avion.

Echu ta ku **tur di nos ta responsabel pa nos akshonnan**—sea ta gerensia òf empleado, sea ta doño òf trahadó. Tirando kulpa pa nos akshonnan riba otronan no ta e solushon. Talbes den un mundu imperfekto, hende por logra nan meta dor di hasi esei. Ma al fin i al kabo, **Dios ta tene kada un di nos responsabel pa nos akshonnan**, i ningun hustifikashon lo por konvens'E pa kambia Su opinion.